



白沙岬燈塔該位

白沙岬燈塔，在觀音个海脣，係一個恬靜个所在。毋過，燈塔北片到大園海脣有一大排个風力發電機，恬風時節，佢兜高天天仔企等，想等科技發展个未來；東北風來个時節，佢兜放勢牯振就係振，大家會相爭來看風有幾煞力、幾煞猛仔。偲係對燈塔行往出，一直行到南片个新屋，該就係「桃園觀新藻礁生態系野生動物保護區」，係全世界都罕得有个，分珊瑚藻歇地幾下百、幾下萬年正歇出來个生物礁海岸。

偲先對燈塔該位行往入，來去觀音个街路遠遠啊。正行著幾步腳仔定定，就來到觀音个老街咧，就算係較大目新娘个人，定著乜會看著桃園客運站摻一間當大間个廟。這間廟安到「甘泉寺」，裡肚服侍个主要神明係「石觀音」。清朝時節這位安到「石觀音庄」，同這尊神明有盡大个關係；廟名安到「甘泉寺」，係因為廟脣還有一個出泉水來救人間人个位所。

聽在地人講這泉水異甘，係承來炙茶乜全無石灰，偲就煞煞行入去尋泉水。無想著行入巷仔裡肚看著个，係另外一片開陽个廟坪。泉水對觀音石像个水盂仔裡肚流出來，悠悠个水聲、風恬恬仔行過廟坪前田坵个慢動作，害偲一儕人企在該位險險毋記得時間。等看著觀音石像脣項个兩行仔字，寫等「係愛用桶仔攪水，請去到廟裡肚尋人拿鎖匙」，正同吾思想拉轉來人間。石觀音、甘泉水个故事，記錄在廟裡肚个壁項，你係有閒，乜做得去看看啊、感受一下。

日頭愛落山哩哟，燈塔火緊來緊顯，街路項共樣無麼个人行，偲撈撈仔聽得著个聲哨，係海陸客家話。一個老伯姆搭等吾手，問偲：「偲戴白玉，你戴哪位啊？偲肖鼠，八十二歲；你肖麼个？來偲屋下坐啊？」佢問地一遍又加一遍，全全毋記得自家有問過，又還問加一遍。偲望向燈塔：「教偲啊，愛仰仔應正好？」燈塔單淨穩穩企等，喊偲自家想。

偲想，在全臺灣三十五個燈塔裡肚，漁翁島燈塔盡老、臺中港燈塔盡高，日月潭燈杆係海拔盡高合無佢海脣个。白沙岬燈塔，佢毋係盡高、毋係盡老，乜毋係在臺灣个盡西片，毋過，百過零年來，佢本分个做事。就算在二戰時期，分人炸到綿綿，又重新企正，單純个守顧等需要佢守顧个人。該種本分同單純，在白沙岬燈塔該位个人同風景裡肚，都還看得著。

作者：彭瑞珠

☆詞彙學習☆

- 【白沙岬燈塔】pag sa' gab` den' tab`：白沙岬燈塔。位於桃園市觀音區觀音里。
 【大目新娘】tai mug` xin' ngiong`：詞出「大目新娘看毋著灶頭」，比喻看不到顯而易見物品的人。
 【珊瑚藻】san' fu' zo`：又名鈣化藻，細胞壁中含有石灰。
 【撈撈仔】lo lo e`：疏落、隱約的。
 【放勢牯】fong se gu`：盡全力的。

☆文法學習☆

- 【行往出】hang` gong' cud`：往外走。「V+往+方向」，表示動作依一定方向進行。
 例1：看佢行往出，怕係愛去過家。（看他往外走，可能是要去串門子。）
 例2：同佢撻往上，好無？（我們把它往上推，好嗎？）